

von Wulf Wager

Wenn Frau eikaufat



Wenn i eikaufa gang, no gang i en da Lada, probier ebbes, was mr gfallt, wenn 's passt, kauf i 's ond ben en maximal ra halba Stond fertig. Bei ma Hemmad brauch i 15 Minuta ond rond 100 Euro.

Wenn mei Frau eikaufa goht, bummelt se von Lada zu Lada, kruschtelt dort, probiert selt, ziagt raus, glotzt en da Spiegel, fendet sich z' dick, hängt wieder nei. Ond noch zwoi Stond braucht se erscht amol a Espresopause. No goht's grad nomol zwoi Stond so weiter. Insgesamt

braucht se vierahab Stond ond gibt en derra Zeit rond 600,- Euro aus.

Mir hot se jetzt klar macha wella, dass sie betriebswirtschaftlich besser gebildet sei ond sie deshalb rein betriebswirtschaftlich dr bessere Ei'käufer sei. I han ihr no versuacht klar zom macha, dass i en ra Viertelstond grad amol 100 Euro ausgeba han, ond sie en vierahab Stond 600,- Euro. Isch doch klar, dass sie do des schlechtere Verhältnis hot, weil sie meh ausgeba ond länger braucht hot. Noi, noi, so sei des net, hot se mir erklärt: Wemmr onser Eikaufsverhalta auf d' Minut' omrechna dät, häh i en ra Minut' 6,66 Euro ausgeba, während sie en dr Minut bloß 2,22 Euro ausgeba hätt. Wenn sie genauso vrschwenderisch mit em Geld omganga dät wie i, hätt sie in derra Zeit sogar 1798,20 ausgäba. So hätt sie jede Menge Geld gspart ond könnt sich von dem ersparta Geld no meh Schuah kaufa, om auf die Art ond Weis no meh Geld zom spara. Weibliche Logik...

Bis näggsch Woch

Eier

Alle Kolumna zom nochlesa ondr www.woascht.de oder em Wulf Wager Fanclub em Facebook